

培福德母就口腹長愚癡飯蔬飲水猶堪  
樂何苦長年被舌欺

三極至命蒼蹄終

析疑指迷論序

芥六

神峰逍遙大師出示高論二編名曰析疑指  
迷清談不吝於曾懷真妙發揮於翰墨平生  
所養於茲見矣幸緣一覽俾予泠泠然獨立  
於通衢不知四肢之有無則可以墻壁玄門  
梯航後學者大德戊戌仲春朔汝南重玄子  
劉道真謹跋

前火傳後火薪異而焰同今聖嗣古聖時殊  
而道一故宜乎馬譚劉立已來演玄風敷妙  
化之真人繼繼而出也神峰逍遙先生牛君  
練師新出奇論二卷目曰析疑指迷屬余以  
文開卷一閱不覺身世兩忘若馭清飈而遊  
乎碧落矣其誘人也循循然有條而不紊使  
人惑志頓消而朗徹其進人也端語一發使  
人浩然長往而不留其言簡其理微其示教  
也深其用心也切此可謂火傳而聖繼者也  
門人恐其微言將沒舉而錄之以裨後進其  
弘師之道如是此亦可謂用心之厚者焉時  
大德三年中秋前三日靜安沖漢道人王道  
亨書

神峰逍遙子闕若幽室倚軒塊坐隱凡忘懷  
適有悟真子李志恒從座而起忝然而立勞  
殷作禮拜而謂曰敢問全真妙理至道精微  
性命之義修行次序願師演而析疑矣逍遙  
子答曰夫至道精微無形無名難演難言非  
容取捨而可得也故心困焉而不能知口辟  
焉而不能辭在人虛府自悟耳其人叩之不  
已志之愈誠由是不得已而應命輒述是論  
名曰析疑指迷庶資初學之漸悟耳時元貞  
二年孟春上元日題